

Kielelezo Kwao Waaminio

Maana neema ya Mungu iwaokoayo wanadamu wote imefunuliwa; nayo yatufundisha kukataa ubaya na tamaa za kidunia; tupate kuishi kwa kiasi, na haki, na utauwa, katika ulimwengu huu wa sasa—**Tito 2:11, 12.**

Kuna kazi kubwa kwa ajili yetu kufanya ikiwa tunataka kuurithi uzima wa milele. Tunalazimika kuukataa uovu na tamaa za kidunia na kisha kuishi maisha ya haki.... Hakuna wokovu kwetu isipokuwa katika Yesu, maana ni kwa njia ya kumwamini Yeye ndipo tunapokea uwezo wa kuwa wana wa Mungu. lakini si tu imani ya juu juu, ni imani ile ifanyayo kazi za Kristo.... Imani iliyohai inajidhihirisha yenyewe kwa kuonesha roho ya kujidhili na kujitoa kwa ajili ya kazi ya Mungu. Wale walio nayo wanasimama chini ya bendera ya Mfalme Imanueli na kupigana vita yenye mafanikio dhidi ya mamlaka ya giza. Wanasimama wakiwa tayari kufanya lolote ambalo kamanda wao anawaamuru. Kila mmoja anatakiwa kuwa, “Kielelezo kwao waaminio, katika usemi na mwenendo, na katika upendo na imani na usafi” (1 Timotheo 4:12), kwa maana tunapaswa “kuishi kwa kiasi, na haki, na utauwa” katika ulimwengu huu wa uovu, tukiwakilisha tabia ya Yesu na kudhihirisha Roho Wake....

Wale wenye uhusiano na Yesu wana umoja na Muumbaji na Mwendelezaji wa vitu vyote. Wanao uwezo ambao ulimwengu hauwezi kutoa wala kuwapokonya. Lakini wakati wanapopewa fursa kuu na zilizotukuka, hawapaswi tu kufurahia baraka zao. Kama mawakili wa neema za Mungu za namna nyingi wanalazimika kuwa baraka kwa wengine. Wamekabidhiwa ukweli mkuu na “kila aliyepewa vingi, kwake huyo vitakwa vingi” (Luka 12:48). Kuna majukumu mengi yaliyowekwa juu ya wote walioupokea ujumbe wa wakati huu. Wanapaswa kuweka mvuto ambao utawavuta wengine kwenye nuru ya Neno la Mungu.... Sisi tu walinzi wa ndugu zetu....

Ikiwa tu waumini wa kweli katika Yesu tutakusanya miale ya utukufu na kisha tutaangaza nuru katika njia yenye giza ya wale wanaotuzunguka. Tutaonesha tabia yenye neema ya Mkombozi wetu na wengi watavutwa kwa mvuto wetu “Kumtazama Mwana-Kondoo wa Mungu, aichukuaye dhambi ya ulimwengu” (Yohana 1:29).